



Sensibilité politique  
Boîte postale 83  
L-7201 Bereldange

CHAMBRE DES DÉPUTÉS

Entrée le :

25 JUL. 2019

970

Fernand ETGEN  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 25/07/2019

Här President,

**Sou wéi den Artikel 83 vun eisem Chambersreglement et virgesäit, bieden ech lech, dës parlamentaresch Fro un d'Ministere fir Mobilitéit, Emwelt, Klima a nohalteg Entwécklung & Wirtschaft weiderzeleeden.**

An der Äntwert op meng parlamentaresch Fro n° 780 huet d'Regierung hir Positioun iwwert d'Besteuerung vu Fluchreesen erkläert, ouni sech dobäi op eng konkret Mesure festzeleeën. D'Regierung verweist op d'Siche vun enger europäescher Solutioun.

D'Regierung erkläert weiderhin "datt d'Externalitéiten vun de verschiddenen Transportmëttelen solle korrekt berücksichtegt ginn a sech an dem entsprecherende Präis erëm spiegelen." Domat beäntwert si mir awer net meng Fro, ob si aschätzt, dass potenziell Ëmweltmesuren an déi dovun ausgoend potenziell Präiserhéijungen d'Mobilitéit vu sozioekonomesch méi schwachen EU-Bierger net beanträchtege wäerten?

Des Weideren ass d'Regierung och net op d'Opportunitéit vun enger Impaktetüd vun enger Kerosinsteier fir de Findel agaangen.

Um leschte Punkt vu menger Fro verweist d'Regierung op eng europäesch Steuer fir de Fluchverkéier anzedämmen, mee ëmgeet domadder meng Fro zu de Passagéierzuelen um Findel.

Et bleiwen also nach gewëssen Onkloerheeten, ob d'Regierung fir déi nächst Joren ee konkrete Plang fir de Findel virweise kann.

An deem Zesammenhang wéilt ech de Ministeren dës Froe stellen:

1. Aus menger leschter Fro: Wéi steet d'Regierung zu der Ausso, dass potenziell Ëmweltmesuren an der Fluchindustrie an déi dovun ausgoend potenziell Präiserhéijungen d'Mobilitéit vu sozioekonomesch méi schwachen EU-Bierger verschlechtere wäert? Anescht formuléiert: ass d'Regierung bereet Ëmweltmoosnamen, och an der EU, ze ënnerstëtzen, wëssend, dass eng Steigerung vun de Fluchpräisser de Passagéier mat klengem Portmonni benodelegt?
2. Bezitt sech d'Tarifikatioun, déi d'Regierung am éischte Punkt vun hirer Äntwert ernimmt, och op de Cargoberäich?
3. Vu, dass d'Regierung aktuell nach keng eegen Impaktetüd vu verschiddenen Zeenarie fir de Findel erstellt huet, wär et net opportun an nächster Zäit esou Analysen an Opdro ze ginn fir preparéiert un d'Saachen unzegoen?
4. D'Regierung schreift an hirer viregter Äntwert vun engem externe Wuesstum vum Flugverkéier.



[www.piraten.lu](http://www.piraten.lu)



Sensibilité politique  
Boîte postale 83  
L-7201 Bereldange

- Ab wéi enger Quantitéit definéiert sech ee Wuesstem als "extrem"?
- Consideréiert d'Regierung de Wuesstem um Findel als extrem?

5. Wéi wichteg ass de Fluchhafen Findel fir d'lëtzebuergesch Wirtschaft?
- Wéi vill Aarbechtsplazen (direkt an indirekt) si mat den Aktivitéite vum Fluchhafen verbonnen?
  - Wéi vill Steuerrecettë generéiert de Staat all Joer duerch d'Aktivitéiten vum Fluchhafen?

Mat déiwem Respekt,

GOERGEN Marc  
Député



[www.piraten.lu](http://www.piraten.lu)



Luxembourg, le 26 septembre 2019

**Monsieur Marc Hansen**  
**Ministre aux Relations avec**  
**le Parlement**

CHAMBRE DES DÉPUTÉS

Entrée le :

26 SEP. 2019

**Service Central de Législation**  
**43, boulevard F.D. Roosevelt**  
**L – 2450 Luxembourg**

Monsieur le Ministre,

J'ai l'honneur de vous communiquer en annexe la réponse commune à la question parlementaire N°970 du 25 juillet 2019 de l'honorable député Monsieur Marc Goergen, concernant la taxation du transport aérien, tout en vous priant de bien vouloir en assurer la transmission à Monsieur le Président de la Chambre des Députés.

Recevez, Monsieur le Ministre, l'expression de mes sentiments distingués.

**François Bausch**  
**Ministre de la Mobilité**  
**et des Travaux publics**

**Gemeinsam Äntwert vum Här François Bausch, Minister fir Mobilitéit an öffentlech Aarbechten, der Madame Carole Dieschbourg, Ministesch fir Ëmwelt, Klima an nohalteg Entwécklung an dem Här Etienne Schneider, Wirtschaftsminister, op d'parlamentaresch Ufro n° 970 vum 25. Juli 2019 vum Här Deputéierte Marc Goergen**

Als Äntwert op d'parlamentaresch Ufro vum Här Deputéierten, kënne mir dës Informatiounen uginn:

- 1) D'Regierung ass der Meenung, datt d'Externalitéiten (z.B. Emissiounen, Kaméidi, Stau...) vun de verschiddenen Transportmëttel solle korrekt berücksichtegt ginn a sech an dem entsprechende Präis erëmispigelen.

De Präis vun engem Fliegerbilljee muss deemno realistesch dës Externalitéiten abegräifen. Doriwwer eraus sollen Alternativen zum Fluchverkéier fir Kuerz- a Mëttelstrecken disponibel an accessibel sinn, fir d'Mobilitéit vun alle Bierger net ze verschlechteren.

- 2) Ob de Cargoberäich och betraff ass, hänkt vun der Aart vun Tarifikatioun of (Kerosin, Passagéierbilljee, ...)
- 3) Dat wier duerchaus oportun.
- 4) D'Äntwert schwetzt och vun extremem Wuesstem vum Fluchverkéier am allgemengen a net spezifesch vun der Entwécklung vum Findel. « Extreme » Wuesstem ass ëmmer relativ ze gesinn an léisst sech net generell definéieren. Um Findel sinn d'Passagéierzuelen 2017 ëm 19% an 2018 ëm 12% geklomm.

- 5) Eng Etude, déi lux-Airport an Optrag ginn huet, beleet, datt ronn 24.170 Aarbechtsplazen am Zesammenhang mat dem Lëtzebuerger Fluchhafen stinn. Dorënner falen 6280 direkt Aarbechtsplazen (Fluchafebedreier, Autoritéiten, Fluchgesellschaften), 4030 indirekt Aarbechtsplazen, 4560 induzéiert Aarbechtsplazen an 9300 cataliséiert Aarbechtsplazen. Domat generéieren de Lëtzebuerger Fluchhafen an déi um Fluchhafen etabléiert Gesellschaften ongeféier 5% vum nationale PIB.

Et leien lux-Airport keng Donnéeën vir iwwer d'Steierrecetten, déi vun de gesamten Fluchhafenaktivitéite generéiert ginn.